

Pa prome biaha den historia

Aruba a gana "National Geographic World Legacy Award"

ELOGIA pa su esfuersonan den sostenibilidad, a scoge Aruba como e ganador maximo di e premio "National Geographic World Legacy Award" p'e categoria "Destination Leadership" durante ITB Berlin, e convencion mas grandi di turismo na mundo, cu ta tuma lugar anualmente na Alemania.

"World Legacy Awards" di National Geographic ta reconoce destinacion, ciudad, provincia, estado, pais y regionnan cu ta e.o. desplega e mihor practicanan pa cu proteccion di e ambiente natural, y mantencion di herencia.

National Geographic a ricibi mas di 150 registracion representando 56 pais y 6 continente. E finalistanan den e 5 categorianan a wordo selecciona pa un ekipo internacional di 18 experto den desaroyo sostenibel, cu a bishita e participantenan y a realiza inspeccionnan completo y extensivo prome cu yega n'e 3 nominadonan y eventualmente e ganador absoluto. Aruba a ricibi e bishita aki aña pasa october y d'ey a ricibi e noticia cu e ta forma parti di e grupo di 3 nominadonan.

Ayera cu grato honor, Aruba, a keda anuncia como e ganador absoluto di e premio aclama di National Geographic «Destination Leadership». Aruba a destaca pa su diferente iniciativa. Na aña 2012, Aruba a forma un sociedad cu

Richard Branson di Carbon War Room y otro entidadnan manera Harvard, pa lucha contra cambio climatico.

Debi na Aruba su recursonan natural y ecologico, manera solo y biento continuo y un plan agresivo aproba pa diferente partner, Aruba lo por t'e prome isla na mundo cu lo por ta completamente riba energia alternativo na ana 2020.

«Ta un honor grandi pa wordo reconoci dor di "National Geographic Society" den nos buskeda pa yega na sostenibilidad total», asina Minister di Integracion, Infraestructura y Medio Ambiente, Benny Sevinger, a remarca cu orguyo, mientras el a ricibi e premio pa Aruba na ITB Berlin. «Den e ultimo añanan, nos a traha estrechamente cu varios lider sumamente inovador rond mundo henter pa cu e topico aki y asina profundisa nos conocimiento.

Nos ta orguyoso di mira e esfuersonan aki awe ta structura e caminda pa otro islanan ta den constante evolucion. Esaki ta simplemente e comienso».

E esfuersonan pa Aruba yega di ta un isla completamente sostenibel a wordo cubri aña pasa dor di Bloomberg TV, Wall Street Journal Live, CNBC Power Lunch, CBS y otro puntonan di media internacional. Aruba, Pabien!

